

ՎԵՐԱՕԾՎԵՑ ԹԵԹՐԻԾՂԱՐՈՅԻ ՇՐՋԱՆԻ ՍԱՄՇՈՒԼԴԱ ԳՅՈՒՂԻ ՍՈՒՐԲ ՓՐԿԻՉ ԵԿԵՂԵՑԻՆ

Փետրվարի 23-ին, ձեռամբ Վիրահայոց թեմի առաջնորդ Ս. Վազգեն եպիսկոպոս Միրզախանյանի և մասնակցությամբ Թբիլիսիի Սուրբ Գևորգ առաջնորդանիստ եկեղեցու հոգևոր հովիվ Ս. Եղիշե ավագ քահանա Հարությունյանի, Մառնեուլի և Բոլնիսի շրջանների հայության հոգևոր հովիվ Ս. Հուսիկ քահանա Հարությունյանի, Թբիլիսիի Սուրբ Գևորգ առաջնորդանիստ եկեղեցու դպրաց դասի, վերածովեց Թեթրիծղարոյի շրջանի Սամշուղա գյուղի Սուրբ Փրկիչ եկեղեցին՝ վերանորոգված և բարեկարգված, հովանավորությամբ ծնունդով Սամշուղեցի, Ռուսաստանի Դաշնությունում բնակվող Գուրգեն Հովհաննիսյանի:

Հավարտ վերածման կարգի անդրանիկ պատարագ մատուցեց Մառնեուլի և Բոլնիսի շրջանների հայության հոգևոր հովիվ Ս. Հուսիկ քահանա Հարությունյանը, իսկ հավուր պատշաճի քարոզ խոսեց թեմի առաջնորդ Ս. Վազգեն եպիսկոպոս Միրզախանյանը: Վիրահայոց թեմի առաջնորդի կողմից գնահատանքի և օրհնության արժանացան եկեղեցու վերականգնման գործում ներդրում կատարած Գուրգեն Հովհաննիսյանը, շինարարական աշխատանքների կազմակերպիչ Աշոտ Քոչարյանը, ինչպես նաև շինարարության մասնակիցները, որոնց փոխանցվեց առաջնորդական Օրհնության Գիր և հուշանվերներ: Դեսպանի խորհրդական Եղիա Մանսուրյանն ընթերցեց Վրաստանում ՀՀ արտակարգ և լիազոր դեսպան Հրաչ Միրվանյանի ողջույնի խոսքը, իսկ Վրաստանի Հայերի Միության անունից ներկաներին ողջունեց Վրաստանի Հայերի Միության փոխնախագահ Վան Բայբուրթյանը:

Արարողությունն ավարտվեց ավանդական մատաղի օրհնությամբ, ազգագրական երգ ու պարով և Թբիլիսիի Պ. Ադամյանի անվան պետական հայկական դրամատիկական թատրոնի դերասաններ Ռոբերտ Հովհաննիսյանի և Ռոբերտ Աղաջանյանի ասմունքով:

Արարողությանը ներկա էին՝ Վրաստանում ՀՀ արտակարգ և լիազոր դեսպանի խորհրդական Եղիա Մանսուրյանը, Վրաստանի Հայերի Միության նախագահ Հենրիխ Մուրադյանը, «Վրաստան» թերթի գլխավոր խմբագիր, Վրաստանի խորհրդարանի պատգամավոր, Վրաստանի Հայերի Միության փոխնախագահ Վան Բայբուրթյանը, Թբիլիսիի Պ. Ադամյանի անվան պետական հայկական դրամատիկական թատրոնի տնօրեն և գեղարվեստական ղեկավար Արմեն Բայանդուրյանը, Թբիլիսիի Սուրբ Գևորգ առաջնորդանիստ եկեղեցու հավատացյալներ, վիրահայ մշակույթի գործիչներ:

Թեթրիծղարոյի շրջանի Սամշուղա գյուղի Սուրբ Փրկիչ (Սուրբ Աստվածածին) քարաշեն եկեղեցին կառուցվել է 1854 թ.: Ունեցել է հոգևոր դպրոց, 40 ծուխ՝ 400 բնակիչներով: Գյուղից 500 մետր հեռավորության վրա գտնվում է 18-րդ դարի Սուրբ Աստվածածին ուխտատեղի քարաշեն մատուռը, մեկ այլ ուխտատեղի՝ Սուրբ Գևորգ մատուռը, գտնվում է գյուղի մյուս կողմում՝ անտառի մեջ:

*ՀԱՅ ԱՌԱՔԵԼԱԿԱՆ ՍՈՒՐԲ ԵԿԵՂԵՑՈՒ
ՎԻՐԱՀԱՅՈՑ ԹԵՄԻ ՄԱՍՆՈ ԴԻՎԱՆ*